

Mar. Luther.

Wittenb. 1535.


Ji
3375 h

183.

00
Rom



Eine Warhafftige
Historia geschehen zu Stasfart/ am abend
der geburt Christi/ im
M D XXXIII jare.


Mit einer schönen Vorrede/
D. Mart. Luther

Gedruckt zu Wittenberg/
Nickel Schirlentz
1535



Universitäts-
Bibliothek
Halle

2 2, 3528



Dem achtbarn hoch
gelarten herrn/ Er Nicolao von
Amsdorff zu Magdeburg
Prediger/ meinem lie-
ben herrn vnd ge-
vattern .

D. Martinus Luther.



ottes gnade vnd
friede im Christo. Es
ist ein druck ausgegan-
gen/ als von einem ge-
spenste/ dem Pfarher zu
Stasfurt/ im dieser ne-
hesten Wigennacht / er-
schienen im eines Beicht Kindes gestalt/
Darüber ich seer gerne wolt/ ewr richtig
vnd dörrer vrtail/ (wie ihr im solchen sa-
chen zuthun pflegt vnd geneigt seid) haben/
Denn wo es also ergangen were/ machte
mir es dennoch gedancken/ wie wol es nicht
darff viel fragens / wer er sey / der gefelle/
A ij son-

sondern was er damit meine/ das er so für
re wil werden/ vnd kömpt so sicher/ als het
te man ihm geförnet/ Vnd on zweifel/ weil
Christus selbest bekennet / das Beelzebub
ein Königreich habe auff erden/ wird solch
er sein demütiger legat/ nicht on seines Kö
niges befehl komen sein/ vnd so herzlich ger
ne beichten wollen/ Denn ihr wisset (samt
vns) fast wol/ wie solcher armer sündler/ so
grosse reue vnd leid für seine sünde allzeit
gehabt habe / von anbegyn der welt her/
Vnd wunder gerne auch gnug thun wolt/
für seine sünde/ wo ihm Gott dasselbe ge
statten wolt/ Aber Gottes barmherzigkeit
ist zu gros/ vnd sorget für den armen demü
tigen sündler/ Er möchte sich sonst zu tode
fasten vnd Gasteyen / odder grösser werck
thun/ damit er sich selbs / als ein schwach/
from/alber/ geistlin verderbete/ Darumb
wil er solchen armen sündler nicht beschwe
ren/ mit solchem gnugthun / Sondern sel
best ein mal dazu thun / das er seine rechte
Absolutio krieger / vnd nicht mehr dürffe
gnug thun für seine sünde / Amen.

Nu es

Nu es heisst stück vmb stück/ Vnd gilt
wer des andern zuletzt am besten spotten
wird/ Vnd wenn schon solch gespenst nicht
erschienen were / So wissen wir Christen
doch on das / was er fur gedanken hat
(wie Sanct Paulus sagt) Er wird ja mein
Scheblimini lassen bleiben / vñ den selbigen
weder mit zorn noch spot herunter reissen /
Denn ist mein ketzer büchlin (die heilige
schriffte) recht / so mag er mein Scheblimini
inn die ferssen beissen / Wird ihm darüber
der kopff zutretten / von dem selben Schebli
mini / so darff er zu seinem schaden / widder
umb für spot nicht sorgen / Als denn wol
len wir ihm nicht beichten (wie er thut) son
dern vom richtstuel herab / anders sagen / al
so / Das thu vnd stierb wiglich im hellischen
ferwer .

Sihe da / Ich wolt euch bitten vmb ein
vrteil vñnd deutung dieses gespenstes / so
hette ich es selbs schier gethan / Das wollet
mir gonstiglich verzeihen / Ich habe nicht be
dacht / das ihr der Christlichen Kirchen zu
Magdeburg / der oberste vñnd recht Bissch
A iij off seid /

off seid/ der Psaltes war nicht vorhanden/
der mit seiner musica/ mich hette solche gro-
ße maiestet ewrs standes zu bedencen er-
wecket/ sonst were ich nicht so künne gewest/
Darumb bitte ich noch vnterthemiglich/ wol-
let mir ewre meinung schriftlich anzeigen/
im diesen hohen sachen / vnd das frome
beicht kind malen vñ anstreichen/ wie er es
verdienet hat / Wo ihr aber die sachen mir
woltet widder heim schieben / vnd mich für
einen Papst (wie ich euch für einen Bissch-
off) halten/ (Gott sey es von vnser beiden
wegen vnuerwust der grossen ehre) So
habt ihr doch zubedencen/ das gar offte die
Bischove geleter vnd frömer gewest sind/
weder die Bepste/ als Sanct Augustinus
zu Hypon ach ein elender Bischoff / gleich
wol ober alle Bepste vnd Bischove/ der ge-
lerteste vnd beste (ob er gleich nicht der aller
heiligiste) gewest/ Nicht das ich hie mit den
fromen legaten spotte / Vnd wie kund ich
auch solchen hohen geist spotten? wenn ich
es gleich gerne thette.

Dazu

Dazu/so ich eben mit ernst / als ein
Papst / solchem legaten wolt gerne ant-
worten/ So wisset ihr/ ehe ich meine Car-
dinal vnd Prelaten zu samen bringe / sind
sie erhungert / verbrent/ ertrenckt / ermor-
det/ veriagt/ zerstreuet u. das mein Con-
cilium viel weniger kan gehalten werden/
weder des Römischen Papsts/ der es wol
halten köndte/ wenn er wolte vnd sich nicht
besorgen müste/ das ihm nicht so wol gehen
würde/ als im Costnitzer Concilio/ den drey
Pepsten auff einmal gieng/ Darumb wils
fast bey euch/ als dem Erzbischoff vnd Or-
dinario Locio odder Diocesan bleiben/ was
hierin zu thun sein wil / Ich zwar / der sich
nennen leßt einen Papst/ (vnd bins auch)
Wil euch (damit ewr gewissen sicher hand-
len müge) hie mit Committirt haben/ plenti-
tudinem potestatis/ auch das scrinium pec-
toris / das ihr müget solchen sündler/ als
der inn articulo mortis/ odder wie Sanct
Petrus sagt/ in rudentibus inferni ist/ Ab-
soluiren/ vnd ihm seine rechte gnugthuung
auff legen/ forma, stilo, modo, figura, loco,
tema

*D. Luthers nimmer siq eme
Papst.*

loco, tempore, quibus potest fieri, melioribus, Vel istis, Irascatur tibi omnipotens Deus & retentis peccatis tuis, detrudat te in ignem æternum. Et ego autoritate Domini nostri Ihesu Christi, & sanctissimi domini Lutheri Papæ primi, mihi in hac parte concessa, Absoluo te ab omni misericordia Dei & vita æterna, mittens te his verbis in infernum, qui tibi & regi tuo præparatus est ab initio mundi, Amen.

Auff deutsch also/ Gott der Allmechtige/ sey dir feind/ vnd vergebe dir deine sünde nimer mehr/ vnd stosse dich inn abgrund des ewigen feners / Vnd ich aus befelch vnsers herrn Ihesu Christi/ Vnd des aller heiligsten Vatern Papst Lutheri des ersten/ versage ich dir alle gnade Gottes/ vnd das ewige leben / vnd werffe dich hie mit inn die helle hinein/ die dir vnd deinem konige bereit ist von anbegynn der welt/ Amen.

Denn auff solche beichte gehöret solche Absolutio/ vnd ihr wisset/ wie die beicht ist/ so sol die Absolutio auch sein / Wie ihener
ner

ner pfarher thet/ der auch ein beichtkind für
sich hatte/ dasselbige beichttet also/wis/wis/
wis/wis/wispelt jmer hin/vnd machet kein
wort/ Vnd der Pfarher der war auch des
jares nicht jung worden / balde ober sein
heubt mit der hand/vnd pfeiff leise mit dem
maul/huuh/huuh/huuh/huuh/ wie die Jeger
den hunden pfeiffen / vnd lies das beicht-
kind gehen vnd sprach/ Wie die beichte ist/
so ist auch die Absolutio / Wie das gebete/
so ist auch das reichwerck sprach der teuffel
selbs / da ein Pfaffe im bette complet betet
vnd sich betheret/ Aber das sey scherzens
eine masse / Wir wissen fast wol/das des
Teuffels scherz/vns Christen ein ernst gilt/
wie man spricht/der kazen spiel/ist der meu-
se tod / Gott warnet vns zum gebet / vnd
zum vleissigen anhalten bey dem Euange-
lio teglich / Denn ob er gleich aus grossen
mutwillen sich thar so fecklich stellen/wider
vnsern lieben Herrn/ vnd ein gespötte aus
jm machen/kan es dennoch wol geschehen/
das er selbs nicht wisse/ warumb Gott ihm
solches zuthun verhenge / vnd möchte sich
B noch

noch eben so wol inn seiner Flugheit beschmeißen/ als er sich im Paradis beschmeiße/ do er meinet/ Er hette nu gewonnen/ Aber sich gar nicht versahē, das des weibes frucht solt so kurtz hinder im her sein / vnd im das heubt zutretten/ Es hat im auch wol mehr hernach die kunst gefeilet/ Wils Gott/ das wir ernstlich beten / vnd vleissig Gottes Wort handlen/ sol es im auch noch wol feilen/ wenn er gleich noch so viel ergernis vnd schaden thun würde/ Wo wir aber las vnd faul sein werden/ Warlich ist es sein ernstlich dreyen/ Er wolle vns den lieben Christum nemen vnd zu schanden machen/ Denn er lesst sich mercken/ wie gar einen grossen hauffen Könige/ Fürsten/ Bisschoue vnd Geistlichen er fur sich habe/ vnd wie ein geringes heufflin vnser Christus habe / Es heisst auff deudsch / Schade wacht/ vnd das Euangelion sagt/ die leute schlaffen/ Esaias sagt/ Es gleubets niemand.

Was ir nu weiter hierin verstehet vnd merckt (die weil wir ja nicht mit fleisch vnd
blut

blut zu empffen haben) wollet mirs anzei-
gen Newe zeitung weis ich nicht / Den das
etw kleine Grönicklin ihe lenger ihe war-
haftiger wird / nemlich / das alle Besten
(das gibt jr gestirn inn der helle) den Kei-
sern allezeit feind vnd widder sind / sampt
irem anhangen / vnd thun damit solch gros
wunderwerck / das ich schier selbs möcht ein
Papist werden / Denn wenn sie gleich die
frömisten Keiser verrathen / verkeuffen vnd
sich auff das aller mutwilligst widder sie se-
zen / noch sind sie nicht auffrührisch / Son-
dern / die aller heiligsten Väter / Solch wun-
der zeichen hat Christus selber nicht kon-
nen thun / (schweige denn seine Propheten
vnd Aposteln) Denn er musste auffrü-
risch heissen / vnd als ein auffrührer sterben /
so er doch hatte geheissen / dem Keiser gehor-
sam sein / Aber der Papst vnd die seinen /
verrathen vnd morden die Keiser / vnd sind
dennoch nicht auffrührisch / Fur war / er hei-
sset billich der aller heiligste / gegen welch-
em Christus ein armer sündler ist /

B ij Vnd

Vnd möcht warlich solch gros wunderzei-
chen/nicht allein aus den Lutherischen/son-
dern auch aus Türcken/ eitel Papisten ma-
chen/ Wolan/das had ist heis genug geheitz-
et/Wem es gilt/der wird schweizen müssen/
das weis ich fur war.

Vnser trost ist/vnser hertz/Vnd wie es
S. Paulus nennet/vnsers gewissen zeug-
nis / das wir solch wüten den Teuffel vnd
die Papisten nicht geheissen / noch dazu ge-
raten haben/wie sie reichlich selbs auch zeu-
gen mit der that/vnd zeugen müssen on iren
dancf/Sie haben auch seelen/dafür sie wer-
den müssen antworten/die wir auff vnserm
gewissen nicht tragen dürffen / Sondern
rhumen können an ihenem tage/ das vns
ir thun nicht gefallen / vnd wir auff's hö-
heste da widder geleret haben/Das ist freu-
den / trosts / trokes gnug/ bis mein Sche-
blimini kome/Es gehe inn des darüber wie
Gott wil/es sey spot odder tod/Lang ist ni-
cht ewig/ Dnzweifel/ Ewig wird auch nicht
furk sein/Haben sie auch solch zeugnis ires
herzens/ das werden sie wol stülen/vnd her-
nach erfahren / wie wirs auch zu erfahren ho-
ffen/vnd bitten/das balde geschehe/Amen.

Eine Warhafftige Historia ge-
schehen zu Stasfart.

Ich Laurentius Dö-
ner Pfarher zu Stasfart/
Befenne öffentlich für ider-
man bey meinen warhaffti-
gen worten / vnd bey der al-
ler hochsten warheit / Das
inn dem jare MD xxxiiij.
am abend der geburt Christi vnser Hei-
lands / diese Historien also geschehen ist inn
beicht weise / wie hernach folget / vñ also war-
hafftig ergangen ist.

Ich habe auff den abend der geburt
Christi / nach der vesper / zu Stasfart inn
der PfarKirchen / im Gore Beicht gefessen /
vnd das volck vnter weiset inn dem glau-
ben / die auff den morgen am Christage ha-
ben wolt zu dem hochwirdigen Sacrament
gehen / Vnd als ich die selbigen alle gehort
habe / vnd vnterricht gethan / nach meinem
vermügen / mit Gottes hülffe / Vnd bin auff
gestanden / vnd willens gewest inn meine
B ij behau

Behausung zu gehen / vnd habe niemand
mehr gesehen / der do hette wollen beichten.

Zum letzten / ist einer gekommen / ein ein-
feltiger mensch / nach meinem bedüncken /
aber inn der haut ein lauter schalck / gefle-
det mit einem schwarzen bösen rocke / vnd
hatte einen bösen huet auff seinem heubte /
vnd den huet gezogen fur die augen / Vnd
zu mir aus dem stuel getreten / vnd gespro-
chen zu mir mit starcken worten .

Herr / wolt jr mich auch beichte horen /
Ich habe geantwort / Ja / sage her / Vnd er
auff die erden gekniet / vnd von mir gesehen
wol zwene schritte lang / Ich habe gespro-
chen zu im / Wiltu beichten / so mustu mir
neher komen / das ich dich hören kan / was
dein gebreche ist / Er hat geantwort / er we-
re mir nahe gnug / ich würde es wol hören /
was er mir sagen würde .

Vnd hat angefangen / vnd mich ge-
fragt / Herr / was haltet jr von der geburt
Christi / Ich habe geantwort / Ich halte viel
dauon /

dauon/ Denn wie vns ist die schrift anzei-
gen/hat er vns durch seine menschwerdung/
geburt / leiden vnd aufferstehung gefreiet
vnd erlöset von dem ewigen tod vñ verdam-
nis/ Er hat weiter gefragt/ Was ich denn
hielte von seiner geburt / vnd wo er geborn
were / Ich habe geantwort/ Er sey em-
pfangen von dem heiligen Geist/vnd ge-
born aus Maria der Jungfrauen / noch
der bekentnis vnser Christlichen glau-
bens / vnd noch anweisung der heiligen
Schrift/ Er hat weiter gefragt/ Wo ste-
het das geschrieben/das er von einer jung-
frauen geborn ist? Ich habe geantwort/
Die Propheten vnd Euangelisten bezeu-
gen/das sie eine jungfrau ist/als Esaias
am vij. Matthei am ersten/vnd S. Lucas
am ersten. Darauff hat er mir spöttisch ge-
antwort vnd gesprochen/ Ja es mag wol
dastehn / aber ich verstehe die schrift nicht
recht / Vnd hat weiter gefragt/wie ich den
spruch Esaias am vij. verstehe/da also ste-
het im Hebreischen text/ Alma/vñ was heist
Alma auff deudsch? Ich habe geantwort/
ES

Es heisst eine magd / oder ein junges weibs
bilde / die noch einen krantz tregt / vnd unbes-
fleckt ist / Welches die Christen nicht anders
halten vnd gleuben / denn das sie die reine /
unbefleckte magd Maria sey / dauon Chris-
tus vnser Herr vnd Heiland geborn ist /
Er hat geantwort / Das ist erlogen / es mö-
chte wol eine hure sein / do ewer Christus
von geborn ist / Darauff habe ich geant-
wort / Das kanstu / noch niemand zu ewi-
gen zeiten war machen / Vnd fragete mich
weiter vnd sprach / Was ich denn mehr
hielte von Christo / vnd warumb er gecreu-
zigt were ? Ich habe geantwort / Er ist ge-
creuziget vnd gestorben vmb vnser sünde
willen / vnd durch seinen tod / vns gefreyet
von dem ewigen tode / von der sünde / vom
Teuffel vnd der helle . Darauff hat er ge-
antwort / Nein / Er ist gestorben vmb sei-
ner sünde willen / darumb das er ein ober-
treter ist gewesen des gesezes Mosi / Ich ha-
be geantwort / Das ist auff das aller hoch-
ste erlogen / Denn er hat noch nie keine sün-
de gethan / Er ist komen als das warhaff-
tige

tige Lamb Gottes / vnd hat die sünde der
welt weg genommen.

Da hat er angefangen / vnd hat gesagt /
Ich bin gangen auff dem felde / vnd habe
den himel sehen offen stehen / vnd Moses
hat von dem himel er nider gesehen / vñ sei-
ne hörner aus dem himel gestreckt / vnd an
dem einen horn Mose hat ewer Christus
gehangen / der selbige hat sich vnterstanden
das gesetzte Mosi zu zerstören / vnd Moses
ist zornig worden / vnd hat Christum von
dem horn auff die erde geworffen / den ha-
ben die Jüden ergriffen / vñ vmb seine ober-
tretung widder das gesetzte Mosi / also ge-
kreuzigt vnd getödt / Vnd auff dem andern
horn / hat gefessen der Man der Adam vñ
Eua im dem Paradis von dem apffel hat
gegeben zu essen / Vnd darneben mich drey-
mal gefragt vnd gesprochen / Kennet jr den
Man wol ? wer ist er gewesen ? In dem bin
ich erschrocken / vnd habe geantwortt (Es ist
der Teuffel gewesen) Darauff antwort er
nichts / schweig stille. Da habe ich zu im ge-
sprochen / Warumb verleuckestu Christum /
vnd fur nichtest / schendest vnd lesterst in ?

G

Vnd

Vnd alle diese wort/die du gered hast/sind
erlogen/ So hat ja der Teuffel selbs bekand
das Christus Gottes son ist/ Er hat gefra-
get/ Wo stehet das geschrieben? Ich habe
geantwort/ Lucas am vierden/vnd andern
orten mehr inn dem heiligen Euangelio/
Als der mensch besessen war inn der schule
mit einem unreinen Teuffel/der schrey laut
vnd sprach/ Halt/was haben wir mit dir zu
schaffen Jesu vom Nazareth/du bist komen
vns zu verderben/ Ich weis/wer du bist/
nemlich/der heilige Gottes son/ Weiter da
selbst/ Es furen auch die Teuffel aus von
vielen/schrien vnd sprachen/Du bist Chri-
stus der son Gottes.

Auff diese wort hat er geantwort/Es
mag wol sein/das do selbst stehet geschrie-
ben/Diese wort hat der Teuffel nicht gemei-
net/ist auch noch nie sein ernst gewesen/ das
er Christum hat gehalten fur Gottes son/
Er hatte zu der zeit eine gute herberge/ die
wolt er nicht gerne reumen/darumb gab er
im gute wort/vnd nennet in Gottes son/
Summa summarum/Er hat vnsern Chri-
stum ganz verleugnet/das Christus fur
vns nichts gethan habe zu vnserer seelen se

ligkeit / Zum letzten habe ich zu im gesprochen / War umb bistu den zu mir komen? Wil tu beichten / so beichte / vñ begerestu ein Absolution ober deine sunde vnd vnglauben / vñ zu empfangen in einem rechten glauben das heilige Sacrament / zuuergabung deiner sunde / Hat er geantwort / Er frage noch keiner Absolution / auch noch keinem Sacrament / Er wüste nicht wo zu sie im dieneten / Er wüste auch damit wenig frucht zu schaffen / Da sprach ich zu im / Gehe weg / dahin du gehörest / Er sprach / ich wil es thun / vnd auff den morgen wollen wir anders da von reden / Da antwort ich / das thn küniglich vnd kom wider. Da stund er auff von mir / vnd stanc gewolich / Wo er aber hin kam / das weis Gott / vnd wer er sey gewesen / ist Gotte wol bekand / Aber nach seiner verheissung / ist er nicht wider komen / ich beger auch seiner nicht. Diese historien ist geschehen im jare vñ tage / wie oben gemelt ist / Gott der Allmechtige durch Ihesum Christum vnsern Heiland / der behüete vns fur dem Teuffel vñ seiner verführung / Vnd erhalte vns durch seine gnade / an seinem heiligen wort / bis an vnser ende / Amen.

Faint, illegible text, likely bleed-through from the reverse side of the page. The text is arranged in approximately 20 horizontal lines.







Di 3375 h




~~h.~~

///







B.I.G.

Farbkarte #13

Blue Cyan Green Yellow Red Magenta White 3/Color Black



Barbaff
 toria gesche
 nsfart/am abend
 urt Christi/ im
 XXXIII jare.
 schönen Vorrede/
 art. Luther
 zu Wittenberg/
 Schirlentz
 S S S

